

Te Heheuraa Api

E ITE IĀ OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALEZIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 1

-- TENUARE 1949 --

MAT. 36.

TE PARAU A TE PERESITENI

U A parauhia i mutaa iho e, "*Mai te au i te mana'o i roto i te aau o te taata, mai te reira ihoa te huru o te reira taata.*"

E mea tia roa, ia tatou nei, ia faaea rii e ia feruri maitai i te mau ohipa ta tatou i rave i roto i te maororaa o teie matahiti i mairi i muri ia tatou nei, oia hoi, te matahiti 1948. E mea maitai ana'e anei te mau ohipa ta tatou i rave i roto i te matahiti 1948. E a ore râ, te vai râ anei te tahi ohipa tia ore ta taton i rave?

Mai te mea ua haapao maitai tatou atoa i te mau ture o te Hau fenua, oia hoi te Hau Farani, e ua haapao atoa tatou i te mau ture a te Atua, ma te tuutuu ore i te mau mahana atoa ra, e mea maitai roa ïa. Mai te mea ra ua ite te hoê o tatou e, aita oia i haapao maitai i te mau ture o te fenua nei, e te mau ture atoa hoi a te Atua, e mea tia roa ïa ia'na ia faa afaro roa i to'na e'a ia ore oia ia hape faahou i roto i teie matahiti apî i mua ia tatou nei.

Hou tatou a rave ai i te hoê ohipa, noa'tu i te huru o te ohipa ra, e mea tia, ia tatou, ia parahi i raro e ia feruri mai-

tai no nia i taua ohipa ra. Mai te mea ua ite roa tatou, na roto i to tatou feruriraa i taua ohipa ra, e riro te reira ei ohipa maitai no tatou ta taihoê, e e riro atoa hoi taua ohipa ra ei tururaa e ei faa turaraa i te ture o te fenua nei e i te ture a te Atua ra, ei reira e tia'i, ia tatou, ia pure atu i to tatou Atua, te Metua mure ore, ia haa manuia ia tatou i roto i te ohipa ta tatou e feruri ra.

I roto i te matahiti i mairi a'enei e mea rahi roa te mau haamaitairaa ta te Atua i horoa mai na tatou nei. Te ho'i noa mai nei te mau taata o te Ekalesia i te haapao maitai e te itoitoe nei ratou i te raveraa i te mau ohipa a te Atua. E mea rahi te mau ohipa i oti, i te Ekalesia, i roto i teie matahiti i mairi a'enei. Ua haamatahia te Fare pureraa apî i Tahiti nei, ua tomohia te Fare putuputuraa i Takaroa ra, ua haamata-faahou-hia te neneiraa i ta tatou Ve'a "*Te Heheuraa Apî*" e e rave rahi atu â te mau ohipa maitatai ta te Ekalesia i rave, no reira, e mea tia roa, ia tatou, ia haamaitai atu i te Fatu no te reira.

I roto i te matahiti 1949 i mua ia tatou nei, e mea tia roa ia tatou atoa ia faaitoitoe ia riro tatou ei feia haapao maitai i te mau ture o te fenua nei. Ia riro tatou ei feia haapao maitai a'e, i te mau faaueraa a te ture, i te mau taata atoa e tia'i, ei reira te Atua e mauruuru ai ia tatou nei, no te mea o te hoê tufaa te reira no te Evanelia a Iesu Mesia. Mai te mea ua riro te taata ei melo maitai no te Hau fenua, ua riro atoa ia oia ei melo maitai, e te haapao, i roto i te Ekalesia a Iesu Mesia i te Feia Mo'a i te Mau Mahana hopea Nei.

Te pure atu nei au i te Atua ia horoa mai i te mau mea e au no to tatou oraraa i roto i teie matahiti apî. Te pure atu nei au Ia'na ia horoa mai i te oraraa maitai, e te manuia hoi, no te mau taata faatere no to tatou Hau Rahi Farani, ia ore roa te mau peapea i faatupuhia e te tama'i rahi i oti a'enei, ia haamaitahia te Tavana Rahi no Oteania nei, e tae noa'tu

i te mau taata atoa i raro a'e i ta'na faatereraa, ia noaa ia'na te mau haamaitairaa atoa a te Atua, tei au i to'na toro'a teitei e te hanahana, ia tia ia'na ia faatere ia tatou mai te au i te hinaaro o te Atua, ia maraa faahou â tatou i nia, na roto i ta'na faatereraa. Te pure atu nei au i te Atua ia horoa mai Oia i te mau haamaitairaa atoa tei au i te mau taata faatere o te Ekalesia nei, ia tia to ratou mau mana'o i te hinaaro a te Atua, ia tere te ohipa a te Fatu i mua, i roto i teie matahiti apî. **E i te hopea ra te pure atu nei au i te Atua ia horoa mai i te aau tae i te mau taata atoa o te fenua nei, mai te mau taata faatere o te mau Haapaoraa atoa e tae noa'tu i te hui raatira, ia uruhia ratou i te Varua o te Atua, ia noaa ia ratou atoa te parau hau o te Evanelia a te Mesia ra.**

Ua tae mai te Mesia i nia i te ao nei no te faatupu i te parau hau. Ia tupu te parau hau i rotopu ia tatou atoa nei i roto i teie matahiti apî nei. Ia noaa ia tatou atoa te oaoaraa mau i te haa fatata raa'tu i te Fatu ora, na roto i te haapaoaraa i te mau ohipa maitai e te parau-tia atoa hoi, o ta'u ia pure na roto i te i'oa o Iesu Mesia ra, amene.

Ia orana outou i te matahiti apî, e te maitai rahi, 1949.

*Papaihia'tu e te Peresiteni Misioni
E. Bentley Mitchell Jr. (Mitiela)*

EDITORIAL

EAHA MAU TO OUTOU FAAROO I TE MESIA?

O to Iesu Mesia ana'e i'oa tei horoahia mai, i rotopu i te taata nei, ia tia ia faaorahia ratou, e noa'tu i te reira ua iti roa te taata tei faaroo Ia'na. Eaha mau ia te mea e ite papu ai tatou e, te faaroo nei ratou i te Mesia?

Aita roa i faataa-hia, i roto i te opuaraa ora o te taata, i te hoê vahi tei parau mai e, e fâ mai te Fatu i te mau taata ta taitahi no te faaiteraa mai Ia'na e, o Oia mau te Faaora o teie nei ao, ma te parau mai, i te taata, ia faaroo Ia'na, ia haapao i Ta'na ra mau faaueraa ia tia ia'na ia faaorahia. Te ora nei tatou i roto i te faaroo. No reira te tono mai nei te Fatu i to'na mau ite, e to'na mau ve'a, no te faaite mai Ia'na i mua i te aro o to ratou mau taata tupu. Ua faataa-mo'a-mau-hia te reira mau ve'a, e i te taimē e parau mai ai ratou ra, o te parau ia a te Fatu ta ratou e parau ra. O ta ratou mau parau, o Ta'na ihoa ia parau. Te parau nei ratou ei auvaha mo'a e na roto i To'na ra i'oa,

Ia ore te taata ia farii mai i te reira mau ve'a, te patoi mau nei ratou i tei tono mai ia ratou. E haapiiraa papu teie, ia ore te taata ia faaroo i te mau peropheta ora ra, eita roa ia e tia ia haapii ia'na i te tia ra, noa'tu e ua haere mai te hoê, no roto mai i tei pohe ra, no te faaite atu i te reira parau ra.

Ua heheu mai te Fatu, ia Moroni, i taua mau parau mau rahi ra, oia hoi, "*E o te ore e faaroo i ta'u mau parau, e ore atoa e faaroo i ta'u mau pipi, — te vai nei Au*", oia hoi, te ora nei Oia e o oia ihoa te Mesia. (Etera 4:10, 12) Ua na ô atoa mai o Nephi, i roto i te Buka a Moromona, no te mau mea ta'na iho i papai e, "*E ia faaroo outou i te Mesia ra, e faaroo atoa ia outou i teie mau parau, no te mea, o te parau ia te reira a te Mesia*". (2 Nephi 33:10)

E i te haamataraa mau o teie tau tuuraa Evanelia hopea nei ua parau mai te Fatu i te Peropheta e, ua faatoro'ahia oia no te haere e faaite i "*Ta'u parau mau i rotopu i te mau tamarii a te taata nei*" e e "*farii i teie nei u'i i ta'u parau na roto ia oe.*" (Buka Fafau 5:6, 10) No reira te tia nei o Iosepha SEMITA ei ite matamua, no Iesu Mesia, i teie nei tau hopea, e ua na roto hoi ia'na i te tuu-raa-hia mai te parau a te Mesia i te taata nei.

Te ite papuraa mau i te Mesia, o tei riro ei mea tumu no te ora, e tae mai te reira na roto ana'e i te heheuraa no ô mai i te Varua Maitai ra. Ia ora te hoê taata i te oraraa tei horoa ia'na te tia ia farii i te reira ite mo'a ra, e faaite atoa mai taua Varua ra i te mo'a raa o te mau ohipa a te mau peropheta ta te Fatu i tonono mai no te raveraa i te ohipa na roto i to'na ra i'oa. Hoê noa iho e'a no te ora e vai nei, e tae noa'tu i te taime e tae Mai ai te taata i te uputa pirihaora, no roto ia oia i te tahi nănă ê atu i te nănă a te Fatu.

Ua tia o Birikama YOUNE ei ite mau no te Mesia e no Iosepha SEMITA atoa hoi. Ua tuu oia i teie parau faaite papu maitai, oia hoi: "*Mai te mea te ora mau nei Iesu, e o Oia te Faaora o te ao nei, e Peropheta mau ia o Iosepha Semita na te Atua, e te ora nei oia i roto i te ouma o Aberahama, to'na ra metua. Noa'tu e ua taparahi ratou i to'na ra tino, te ora nei oia e te hi'o nei oia i te mata o to'na ra Metua i te ra'i ra; te vai porao ore nei to'na ahu mai to te mau melahi tei faaati i te terono o te Atua; e aita e taata e vai nei, i nia i teie nei ao, te tia ia parau e, te ora nei te Mesia, e i taua taime mau ra, te patoi maira i ta'u nei parau no nia i te Peropheta ra o Iosepha. O teie ta'u parau faaite, e e mea puai mau.*" (Te mau a'oraa a Birikama Youne, apî 702)

I roto i teie nei tau ua patuhia te oraraa o te taata nei i nia i na parau mau rahi e piti, oia hoi: (1) E Tamaiti mau o Iesu Mesia na te Atua, e o oia te Faaora o te ao nei; e te (2) O Iosepha SEMITA, o to'na mau ia ite e te manhaa ta'na i rave no te faaho'iraa mai i te Autahu'araa e te îraa no te Evanelia mure ore.

Teie ia te tamataraa: Te taata o tei faaroo i te Mesia o te taata ia te farii, e te haapao, i ta'na mau faaueraa e te pee atu i te mau haapiiraa a te mau peropheta Ta'na i maiti. O Iosepha SEMITA ra, o oia te upoo no te horoaraa peropheta i roto i te Horoaraa no te Iraa o te mau Tau, no reira, i roto i to tatou nei tau, teie ia te tia, ia farii ia'na e ta'na ohipa mo'a.

E HAAPIIRAA

E tuaatiraa teie.

TE OPUARAA A ELIELA.

Te vai atura te hoê tamaiti a te Metua mure ore, o ELIELA to'na i'oa, oia hoi, o SATANI. E tamaiti itoito e te nounou mana oia, e ua feii oia i to'na ra tuaana ia Iesu. Patoï ihora i te matahiapo ta te Metua i maiti, mai te faaite atu i ta'na iho opuaraa tei ore i faatumuhia i nia i te Evanelia mure ore. Ua faaite atu te Fatu i te reira, ia Mose, na ô atura, "*Ua tae mai oia (Eliela) i mua i to'u nei aro, na ô maira, 'Inaha eie au, a tonu ia'u, e riro vau ei tamaiti (no te oraraa tahuti nei) no oe. E e faaora vau i te mau taata atoa, ia ore ia mo'e ê atu te hoê noa'e.' E e rave ihoa vau i te reira, no reira, a horoa mai i to oe tura no'u. Inaha ra, to'u tamaiti here, oia hoi to'u tamaiti here tei maitihia mai te matamua mai â, ua na ô maira oia, 'E tau Metua e, e haapaohia to oe hinaaro, e no oe te hanahana e a muri noa'tu.' No reira, no to Satani patoiraa ia'u e to'na hinaaro hoi i te faaore i te tiamâraa o te taata ta'u, ta te Fatu, te Atua, i horoa no'na, e faahou â, no to'na hinaaro ia horoa atu vau i to'u iho mana mo'a, na roto i te mana o to'u tamaiti fanau tahi i faaue ai au ia hurihia oia i raro, e ua riro oia ei Satani, oia ia, ei Diabolo, te metua no te mau haavareraa atoa tei haavare noa'tu no te haamata po i te mau taata nei ra.*" (Mose 4:1-6)

TE TIAMARAA.

E mea ê te opuaraa ta Eliela i mana'o, i ta te Atua, oia hoi, te tuuraa i te taata i nia iho i te hoê ao tahuti, ia faaho'i hia oia i mua i te aro o te Atua na roto i to'na iho haapao-raa, Ua farii, e ua turu hoi Iesu i ta te Atua opuaraa, o te opuaraa ia i haapaohia i nia iho i te mau ao atoa no mua'tu, oia hoi, te tafifi-ore-raa i te tiamâraa o te taata ia haapao ia'-

na iho. O te tiamâraa o te taata te tumu rahi no to ratou haere-raa i mua. Mai te tau mai â o Adamu ua tia i te taata ia maiti no'na iho e haapii anei oia i te tufaa rahi, e a ore râ, te tufaa iti, e haapao anei i te mau ture a te Atua, e a ore râ, e patoi i te reira.

TE HURU E O TE TAATA.

I te mau varua tei haa-putuputu-hia i roto i te apooraa rahi i te ao ra, aore roa na taata toopiti tei aifaito. E mea itoito te tahi e e mea huru faatau te tahi. Ua faatura noa ra te Atua i te tiamâraa o te mau Varua. Ua poro itoito o Eliela i ta'na opuaraa i rotopu i te mau varua e ua pee ihoa te tahi pae na muri ia'na mai te mana'o e, e faaorahia ratou paatoa ma te haapao ore i te mau ture no te haereraa o te taata i mua.

Area ra aita te pae rahi i vare ia'na. Ua hinaaro râ ratou i te haere mai i nia i teie ao apî ma te ohipa apî, ia tia ia ratou ia haapao i ta te Atua, mai ta Iesu i poro.

TE TAMA'I I TE AO VARUA RA.

Ua faaite mai te papairaa mo'a i te aamu no te tama'i tei tupu, i reira, no taua amahamaha raa. "*E e tama'i tei nia i te ra'i: O Mihaela e ta'na ra mau melahi tama'i atura i te teni; e ua tama'i maira te teni e ta'na mau melahi. Aore ra i riro te rê ia ratou; e aore roa'tura o ratou e parahiraa i nia i te ra'i. Hurihia'tura hoi te teni rahi i rapae, o taua ophi tahito ra ia, o tei parauhia o te diabololo ra, e o Satani hoi, o tei haavare i to te ao atoa nei; i hurihia oia i rapae i nia iho i te fenua nei, e ta'na mau melahi atoa ua huri-atoa-hia i rapae.*" (Apokalupo 12:7-9) E ua na ô maira o Isaia: "*O to oe hoi mairiraa mai te ra'i mai, e Eliela, e te tamaiti a te poipoi e! o to oe hoi tapuraahia i raro i te repo, o tei haavii-vii i te mau fenua nei e! Ua parau ra oe i roto i to aau ra e,*

e haere au i nia roa i te ra'i ra; e faateitei au i tau terono i nia a'e i te mau fetia o te Atua ra; e parahi hoi au i nia i te mou'a amuiraa ra, i te pae i apatoa ra." (Isaia 14:12, 13)

E mea na reira te opuaraa ta Iehova, ta Mihaela, e te mau varua itoito atoa i poro, i te fariihia e te pae rahi o te mau varua tei hinaaro i te haere mai i nia iho i teie nei ao. Te vai atura tei ore i farii, e aita ratou i faatiahia ia haere mai e rave i te hoê tino tahuti. Ua faaerehia ra ratou i te mau maitai no ô mai i te Atua ra.

Ia feruri maite tatou i te tiaraa rahi o te tiamâraa o te taata nei e tia'i. No reira i tupu ai te mau tama'i e rave rahi, oia hoi, te vai ra tei hinaaro i te faaore i te tiamâraa o te taata nei ra. Eita roa te faahepo e manuia noa i nia a'e i te tiamâraa.

TE MAU ORO'A NO TE EVANELIA.

Ua faataa-atoa-hia te mau oro'a no te Evanelia ei tautururaa i te mau ture natura. Na te Atua, te Metua mure ore, te reira faataaraa, e na to'na ra tamaiti, na Iesu, i tuu i te reira i nia iho i teie nei ao ei tautururaa i te mau tamarii a te Atua, ia ho'i faahou ratou i mua i to'na aro. Teie taua mau oro'a ra, mai te bapetizoraa, te tuuraa rima, te mau oro'a hiero, te Autahu'araa, te faaipoiporaa, e te vai atura. E tufaa ana'e ia no te opuaraa no te faaoraraa i te taata. Ua faatupuhia taua mau oro'a, no te Evanelia nei, hou te taata i tuuhia'i i nia iho i teie nei ao. E mea mure ore te mau oro'a, e o te Atua ana'e tei mana ia faa huru ê i to ratou raveraa, e te ravea hoi e ravehia'i. E haapiihia te huru o te mau oro'a i roto i te mau haapiiraa i mua nei.

Ua na ô maira Iosepha Semita, te peropheta e, "*Ia roaa te ora i te taata, ia auraro ratou, a faarue ai i teie nei ao, i te mau ture e te mau oro'a o tei faatumuhia no teie nei oraraa e tia'i.*"

Aita te Evanelia i huru ê mai te matamua mai â. Te mau oro'a, te mau toro'a, te mau tapao, te hoturaa, hoê ana'e to ratou huru mai te matamua mai â, e a muri noa'tu.

Ua tuu oia, te Atua, i te mau oro'a ia vai noa e a muri noa'tu, e ua tuu oia ia Adamu ei tia i nia iho i te reira, ia faaite ia ratou no te ra'i mai, e a ore râ, na'na e tonono mai i te hoê melahi no te faaite i te reira. Tei raro a'e taua mau melahi ra ia Mihaela, oia hoi o Adamu, o tei raro a'e hoi i te faatereraa a te Fatu.

Te mau oro'a tei faatumuhia i te ra'i, na mua'tu i te faatumu-raa-hia o teie nei ao na roto i te mana o te Autahu'araa no te faaoraraa i te taata, eita ia e tia ia faahuru-ê-hia, ia vai noa ra i to ratou huru mau e tia'i.

No taua Evanelia, e te mau oro'a ra, ua parau mai te Fatu ia tatou e, na ô maira: "Oia ia, oia mau ta'u i parau atu ia outou. O te farii mai i ta'u Evanelia, ua farii ia ia'u. E o te ore e farii i ta'u Evanelia, aita atoa ia i farii mai ia'u. O teie hoi ta'u Evanelia, te tatara-hapa, te bapetizoraa i raro i te pape, ei reira te bapetizoraa auahi e te Varua Maitai, oia ia, te faaa'o e te faaite i te taatoaraa e tei haapii hoi i te mau mea hau no te Basileia." (Buka Fafau 1:5, 6)

TE TIARAA O TE MAU ORO'A.

Mai te haamataraa o te parau tuatapaparaa o teie nei ao, e tae roa mai i teie nei, ua parau mai te Atua, oia hoi, o Iesu Mesia, na roto i te vaha o te mau peropheta e, e mea tia roa te mau oro'a o te Evanelia ia roa ia tatou te ora mure ore. E ora'i te taata no Galilea ua na ô maira oia: "E ore te feia e parau mai ia'u e, E te Fatu, e te Fatu, e hope paatoa i te tae i te basileia ra o te ao, o te taata ra tei haapao i te hinaaro o tau Metua i te ao ra. (Mataio 7:21)

Ua haapii atoa mai Iosepha Semita i te na ô raa e: "Ua ui pinepine-hia vau, e faaorahia anei matou ma te farii ore i taua mau oro'a ra? E pahono atu vau, eita, eita roa e roa te îraa o te ora. Ia noaa i te hoê taata te parahiraa teitei i roto i te Basileia Tiritiera, ia haapao oia i te

mau ture no te Basileia Tiretiera e tia'i, o te taatoaraa ia, e ia roaa ia tatou te ora mau, e mea tia roa te mau mea atoa ta te Atua i faaue mai."

O Iesu Mesia ana'e te hoê noa iho taata hara ore i nia iho i teie nei ao, e noa'tu i te reira ua haapao oia i te mau ture e te mau oro'a o te Evanelia nei. No te aha? "*E na reira hoi tatou i te faatia i te mau parau tia atoa ra*", o ta'na ia pahonoraa'tu ia Ioane Bapetizo.

O Iesu te e'a e tei ia'na te ora, e mai te mea ua tia ia'na ia haapao i te mau oro'a, e mea tia atoa ia, ia tatou, ia roaa ia tatou to tatou ai'a i roto i te Basileia o ta tatou Atua ra.

Faaauhia e Re Orometua

No roto mai i te buka "Te Evanelia i te mau Tau atoa"

TEI RAHI ATU I TE TAATO A

TE HOHO'A RAHI A'E.

Eaha te haapaoraa Cherisetiano? Mai ta to'na i'oa e faai-te maira: o te mau parau mau, te mau haapiiraa e te mau huru ture faatere tei haapiihia mai e Iesu Mesia.

Te cherisetiano o te taata ia tei farii e tei haapao i te mau haapiiraa o Iesu Mesia ra.

O Iesu no Nazareta, tei fanauhia i Betelehemema, tei mau i te ohipa peropheta, o te Mesia ra o tei riro ei tapao no ta'na ohipa Atua, o oia te hoho'a rahi no te ao Cherisetiano.

UA HAU ATU I TE TAATA.

Ua riro o Iesu no Nazareta ei hoho'a rahi a'e i roto i te parau tuatapapa o te ao nei. Ua tae ta'na ohipa i nia i te mau vahi atoa o te ao nei e ua taa ê oia i te mau taata atoa.

E mea ohie roa ia hi'o i te oraraa o te tahi mau taata ara-

tai ekalesia: to ratou mau tutavaraa, to ratou mau manuiaraa e te mau parau faahiahia tei noaa ia ratou na roto i te parau aamu. E mau taata rarahi ihoa ratou, mai tei itehia i roto i te parau tuatapapa o te ao nei.

Area, o Iesu no Nazareta ra, ua riro oia ei hoho'a otahi i roto i te parau tuatapapa o te ao nei. Eita roa e tia ia faitohia to'na faufaa i te faito o te taata nei, e ta'na mau haapiiraa ua hau atu ia i te mau haapiiraa atoa na roto i to ratou ohie.

E tia ia Iesu ia haere i te vahi te ore e taeahia e te mau tamataraa o te taata nei. E faanevaneva e e haavī oia i to'na mau enemi: E faaapī oia e e faaora i ta'na mau pipī. Ua tauatini te mau buka tei papaihia no nia Ia'na. Ua farīi to'na mau hoa, e to'na mau enemi atoa hoi, i te faahiahia o ta'na mau haapiiraa, te mana faito ore o To'na oraraa, e te parau nei ratou atoa e, ua hau a'e oia i te taata nei.

O vai ra Oia ?

I MUA I TE FAATUMURAAHIA O TEIE NEI AO.

I mua a'e i te faatumuraahia o teie nei ao te ora ra o Iesu i roto i te ao varua, i pihaiiho i to'na Metua, to tatou Atua. Te taatoaraa o te mau taata, tei ora na, teie e ora nei, e te ora'tu i nia i te ao nei, tei reira atoa ratou, ei mau varua e ei mau tamarii na te Atua. O Iesu ia ta ratou matahiapo.

Ua mairi te mau tau e rave rahi a rave noa'i te mau varua i te ohipa ma te haapao i to ratou hinaaro. Haere atura to ratou ite i te rahiraa. Area, no to ratou oraraa i mua'tu, opua ihora te Atua, te Metua, i te hoē opuaraa rahi tei parauhia: "TE RAVEA NO TE ORARAA". Faataahia'tura ta'na Tamaiti, o Iesu Mesia, ia riro ei faatere i taua ohipa rahi ra.

E opuaraa ohie taua opuaraa ra. Ia haere mai te mau varua atoa i nia i teie nei fenua, i muri a'e i te mo'eraa ia ra-

tou i to ratou huru matamua ra, a rave ai ratou i te hoê tino tahuti i nia i te fenua nei, ia paruru ratou ia ratou iho i te ino, ia haapii ratou i te unauna o te tusia, ia aro no te oraraa, e ia faaoromai i te mau ma'i, e te pohe atoa hoi. Na te reira mau tamataraa e faarahi i to ratou mana, e faarahi i to ratou hinaaro ia faahope i to ratou faarooraa i te mau ture a te F'atu, e ia horoa noa, no to ratou haereraa i mua, i roto i te ao i mua ra e te mure ore, te mau ravea maitai a'e.

E opuaraa ohie taua opuaraa ra, tei faatiahia no te tamataraa i te mau varua mure ore. E riro ia to ratou oraraa, i raro nei, ei haapiiraa na ratou, te hoê tau tamataraa. No te faaoti-roa-raa i taua opuaraa ra, ua faaotihia, e te Atua, ia haere mai ihoa o Iesu i nia iho i teie nei fenua, ia fanauhia Oia, no roto mai i te hoê metua vahine tahuti noa, noa'tu e o Oia iho tei faa tô ia'na.

TE TARAEHARA.

O te hoê ana'e varua, tei taatihia i te hoê tino mure ore, te tia ia ite i te mau oaoa teitei a'e e ia tae i te faito hopea o to'na tupuraa. No reira ua fafau te Atua, te Metua mure ore, e tia-faahou-mai te mau tino atoa te tanuhia, e o taua ohipa no te tia-faahou-raa ta ta'na Tamaiti, te Mesia, i haere mai e rave.

Ua ofati o Adamu, te taata matamua, i te ture a te Atua, area ra na tia roa to'na ofatiraa i te ture, no te mau varua tei huru tahuti ore, ia tia ia ratou ia taatihia i te hoê tino tahuti noa. No reira ua tuuhia o Adamu i raro a'e i te utu'a o te pohe e ua aratai oia i to'na huaai atoa i taua vahi ra. Na roto i to'na hararaa ua tae mai te pohe i roto i teie nei ao. Na roto i te ohipa a Iesu Mesia ua tia ia faaateahia te hopea o te pohe a tia'i i te tino taata nei ia tia-faahou-mai i te ora mure ore. Ua horoa o Iesu i to'na oraraa, no te pae tino ana'e, ia tia, i to te ao atoa nei, ia ora faahou e ia oa-

oa i te amui-faahou-raa o te tino e te varua. O te huru ia o te taraehara o te Mesia. Eita e tia ia tatou ia haro'aro'a i te ravea miterio tei ravehia e Ana no te reira, area ra, te ohipa rahi aroha tei ravehia ra, no te maitai o te ao nei, e parau papu ia.

TE HOROARAA O TE EVANELIA.

Ua hau atu ta Iesu raverāa no te faa-ore-raa i te hara ana'e a Adamu. Ua afai mai Oia, i te ao nei, i te parau faaite no te parau mau o te aratai i te taata i te oaoa, i teie nei ao e i te ra'i atoa hoi. Ua haapiihia taua parau mau ra, oia hoi, te Evanelia, i te taata matamua ra ia Adamu. Ua faatae-faahou-hia mai, i te tahi tau e i te tahi tau, a faarue ai te taata i te parau mau. I to Iesu haereraa mai, i te ao nei, ua haapii Oia i te reira i roto i to'na huru mau, i te mau taata o to'na ra tau e i teie tau atoa hoi, i muri a'e i te hoê tau poiri. Ua faatia faahou Oia i te reira. I roto i te mau tau ua tamata o Iesu, na roto i te mau peropheta, e a ore râ, na roto i te faa ûrû-raa te tae atu i nia i te mau taata parau-tia, i te tapea i te mau tamarii a Adamu i roto i te e'a te faaho'i ia ratou i te Atua ra, e ia noaa ia ratou te oaoa o te hoê haereraa hopea ore i mua. Ua haa maramarama te reira horoaraa i te e'a no te ora no te mau ratere atoa o tei hinaaro i te haere na nia i te reira e'a.

TE TURE NO TE TUSIA.

Na roto i to'na iho raverāa ua faaite mai Iesu i te ravea e tae atu ai i te oaoa maoro, o te tia ia riro ei tumu no ta tatou mau ohipa. Te hinaaro nei te Atua ia ite ta'na mau tamarii i te oaoa. Te noaaraa o te hoê oraraa oaoa o te hoturaa ia i te fariiraa i te tahi mau parau papu maitai. E mea tia roa i te taata tei imi i te oaoa mau ia haavî oia i te mau hinaaro e ia haapae i te ohipa te ore e au i te mau ture o te Evane-

lia: E mea tia ia faarue oia i te mau hinaaro atoa o te tino ia noaa ia'na te ora. E mea no roto ana'e i te varua o te tusia e noaa mai ai te oaoa mure ore, tei haamata i raro nei, e tei haere i roto i te mau tau atoa. Ua faaoromai o Iesu i te mau mauui o te here; ua vaiiho oia i te mau maitai o te ao nei: ua horoa oia i te taatoaraa o to'na oraraa i tia i te taata ia ite ratou i te oaoa mure ore. Ua rahi atu ta'na tusia i ta te hoê noa iho taata, ua tae to'na mauui i te faito rahi a'e no te mea tei ia'na te hoê ite e te hoê huru Atua. Ua mauini o Iesu no te mau taata atoa e a tautau ai Oia i nia i te satauro te amo ra oia i te mau tusia e te mau mauui atoa o te ao nei. Te hoho'a o te tusia o te ohipa rahi a'e ia i roto i to'na oraraa. Na roto i te reira tusia rahi, tei ite maitaihia to'na mauui, ua noaa Ia'na, no'na iho, te hoê oaoaraa rahi oia hoi, te oaoaraa no te iritiraa i te uputa o te ora i to'na mau taeae e to'na mau tuahine. No To'na here rahi ia tatou nei i oti ai ia'na te reira tusia.

TE FAAORA.

O te reira ia te huru o Iesu no Nazareta, te tamaiti a te Atua. O Oia to tatou tuaana. Ua tia'i Oia i nia i te mau u'i e rave rahi o te taata nei, mai te haamataraa mai â o teie nei ao. Ua haapii noa Oia i te parau faaite o te Evanelia i te hoê ao taria turi e te mana'o paruparu. Ua faaoromai Oia i te mau mauui atoa o te ao nei, ua pohe Oia ia tia i te mau taata atoa ia rave faahou i to ratou mau tino, tei riro ei tino mâ e te tahuti ore. Na roto i Ta'na raveraa ua faaite Oia i te nehenehe e te tia mau o te here e te tusia. I teie nei â mahana te aratai noa nei â Oia ia tatou. E ia tae i te mahana hopea ra, e riro ia Oia ei auvaha no tatou, ei paruru no tatou i mua i te aro o te Atua, e e aratai Oia ia tatou i te ora mure ore.

O Iesu to tatou Faaora.

E tuaatihia teie parau i te ava'e i mua nei.

TE HAERE NEI TE EKALESIA I MUA

To tatou Fare Pureraa Apî.

Mai te au i te hoê parau tei papaihia i roto i te Mataio tei na ô mai: “*E ite hoi outou ia ratou i ta ratou e faahotu mai.*” Te itehia nei teie Ekalesia e te mau ohipa maitai ta’na e rave nei i rotopu i te mau nunaa o te ao nei. E ohipa faahiahia mau te faatiaraa o to tatou Fare Pureraa apî i Papeete nei. Te rave nei te mau taata e rave rahi i te ohipa i nia i taua fare ra. Te tauturu mau nei te **Fatu ia tatou i te reira ohipa**, e na roto i To’na tautururaa rahi, e i To’na haamaitairaa ia tatou, te tere maitai nei te mau ohipa i nia i teie fare, te fare o te Atua. Te tamauhia nei te mau niuniu no te mori uira e te mau auri pape i roto i te piha o te mau Orometua, no te Peresiteni Misioni e to’na utuafare. Ua oti te paturaa i te mau piriki cima, maori râ i nia i te Fare Pureraa iho. Eita e maoro e oti te taatoaraa o te ohipa paturaa piriki. Ua tapoihia te Fare Orometua e te mau piha no te mau pupu i roto i te Haapiiraa Sabati, e te tahi atu â mau piha, i te tapoi raau. Te faa ihia nei te aua, e ati noa a’e te fare, i te repo no te faa nehehehe raa i te reira aua, Ia oti teie fare pureraa e fare pureraa nehehehe roa to tatou no te haamoriraa i te Atua ma te aau haehaa e te mauruuru rahi i to tatou Faaora.

E Faaite-haere-hia te Evanelia i te Mau Fenua atoa nei.

Ua iritihia mai te Buka Fafau, e te Buka Poe Tao’a Rahi atoa, i roto i te reo Paniora no te mau Misioni reo Paniora. Te vai nei na Misioni Paniora e maha i roto i te Ekalesia, e piti i te fenua America Apatoa e e piti atoa i te fenua America Apatoerau. Mai te au i te mau tau i faataahia e te Fatu, te vai ra te taime e iritihia’i taua na Buka ra i roto i to outou iho reo. Oia mau! te tupu nei te parau a te Atua.

Te Hamonia rahi roa’e i roto i te Fare Menemene i Roto Miti.

Te faa-rahi-hia nei e te faa-apî-hia nei te hamonia rahi i roto i te Fare Menemene. Ua itehia teie hamonia e ati noa a’e teie nei ao. E mea rahi te mau taata tei tae i Roto Miti no te faaroo i taua hamonia ra. Ua faataahia te hoê hora, i te mau mahana atoa, ia tia i te mau taata, noa’tu i te huru, ia haere mai e faaroo i te mau pehe nehehehe e faa-tai-hia ra.

E na Fare Pureraa apî no te ati Initia.

Te opua nei te Ekalesia i te faatia i na Fare pureraa apî e hitu, no to ta-

tou mau taeae, oia hoi, te mau Initia. E faatiahia taua mau fare pureraa ra ia tia ia parahi e vau ahuru taata i roto i te fare hoê ra. Te poro-haere-atu-nei te mau Orometua i te Evanelia i rotopu ia ratou ra. I teie iho taime ra aita to ratou e fare pureraa no te amuiraa, no reira. o te reira ia te tumu te Ekalesia e faatia'i i te tahi mau fare pureraa no ratou. E faatiahia e piti fare i te tufaa fenua i Utaha, e toru fare i te tufaa fenua i Arizona e e piti fare i te tufaa fenua i New Mexico. Na roto i teie ohipa maitai e roaa ia ia ratou te ite e te maramarama i nia i te mau mea atoa, e te farii nei ratou i te iraa no te Evanelia a Iesu Mesia, mai te au i te hinaaro o te Fatu.

Te Revaraa o to tatou mau Orometua.

Ua faarue a'enei to tatou mau Orometua here ia tatou, i teie nei Misioni. Ua tere ratou na nia i te pahi Farani ra o Ville de Stasbourg i te fenua Panama. E tere â ratou, na nia i te avion, mai Panama atu i Mexico City. Ia oti te reira tere e haere ia ratou, na nia i te pereoo auahi, e tae noa'tu i to ratou mau utuafare. Aue te oaoa i roto i to ratou mau aau no te farerei-fahou-raa i to ratou mau metua e i to ratou hoi mau hoa i te fenua America. Ua faatupu ratou i te mau ohipa maitatai e rave rahi i roto i teie Misioni; ia riro te reira mau ohipa ei faufaa na tatou paatoa. Ia ora na e Re, Tihoti, Philipi e Lorena i to outou tereraa.

E a'o na Orometua Tapone i te Evanelia i to ratou mau Fetii i Tapone.

E ono Orometua, e piti tamahine e e maha taeae, no te Ekalesia, tei parahi i Vaihi, te reva'tu no te poro-haere-raa i te Evanelia mau a Iesu Mesia i to ratou mau fetii i te fenua Tapone. Ua rave itoito ratou i te ohipa a te Fatu a parahi ai ratou i Vaihi, no reira ratou i maitihia'i no te haere atu i te Misioni i te fenua Tapone. E riro to ratou taeraa i reira ei tauturu rahi no ta mau Orometua Papaa, no te mea e tia ia ratou ia haapii atu, na roto i to ratou iho reo, oia hoi te reo Tapone, e te mau peu o te taata Tapone, i taua mau Orometua Papaa ra.

Ua riro te Radio ei Orometua na te Ekalesia.

Te faaroo noa nei te mau taata e rave rahi, i tera fenua e i tera fenua, i te Evanelia i parauhia e te mau Orometua na roto i te radio. Ua horoahia'tu te tahi mau hora, i te mau Orometua, no te himeneraa, no te a'oraa i te Evanelia e no te haapiiraa hoho'a hoi. Na roto i te reira ohipa maitai te haapii maite hia'tu te Evanelia i te mau fenua, te mau opu, te mau reo e te mau nunaa hoi e ati noa a'e teie nei ao.